

Quota da dunnas è pli impurtanta che l'equiliber regional

DA MARTIN CABALZAR

■ **Cun l'elecziun da Ladina Heimgartner sco directura da RTR ha la SRG.R per l'emprima giada ina dunna al timun ed SRG SSR puspè ina dunna en il directori. Quai pretenda indirectamain in conclus dal cussegl federal che ha stipulà da cuntanschier fin 2020 ina quota da 30 pertschient dunnas en ils gremis directivs da la confederaziun e da ses manaschis parentads. La SRG SSR è in tal manaschi.** Quai ch'il directur general *Roger de Weck* n'ha apparentamain betg cuntanschì tar Radio e Televisiun da la Svizra italiana ha el uss cuntanschì tgunschamain en la Svizra rumantscha. La suprastanza dal SRG.R che consista dad *Oscar Knapp* (Scuol/

Berna), *Duri Blumenthal* (Lumnezia), *Beatrice Baselgia* (Domat), *Gion Cola* (Riom), *Donat Nay* (Trun) ha apparentamain proponì unanimamain al cussegl administrativ SRG SSR *Ladina Heimgartner* sco nova directura sco quai ch'il parsura *Oscar Knapp* ha sincerà a la conferenza da medias.

Dominanza totala da l'Engiadina

Suenter questa elecziun sa chatta la RTR uss en la situaziun inusitada che tant il president da la SRG.R *Oscar Knapp*, sco la directura *Ladina Heimgartner* ed il charedactor *Gian Raming* derivan da l'Engiadina. Suenter che era la *Lia Rumantscha* vegn presidiada actualmain dal Ladin *Duri Bezzola* occupan ils Ladins ussa gist quatter posts da clav en la

Rumantschia. Sin ina dumonda correspundenta da La Quotidiana ha respundì *Oscar Knapp* che sulet la qualificaziun saja stada decisiva per questa elecziun: «Nus n'avain simplamain betg pudì unfri in'excelenta candidata per amur dal proporz regional. Era la quota da dunnas na saja betg stada decisiva. «Tranter las sis candidaturas che èn tuttas stadas valablas n'hai simplamain betg dà in um che fiss stà uschè qualifitgà sco *Ladina Heimgartner*», punctuescha *Oscar Knapp*. Quai saja sa mussà cunzunt en las intervistas fatgas en il rom da l'assisesment. En quest connex fa *Knapp* alusiun al fatg che tar ils programs da radio e televisiun haja per exempel la *Surselva* sco gronda regiun rumantscha ina fitg ferma preschientscha.

Tge di Roger de Weck da questa elecziun?

A la preschentaziun da la nova directura da RTR dad ier en la chasa da medias a Cuira è er il directur general da SRG SSR *Roger de Weck* che è stà ils ultims trais onns il schef da *Ladina Heimgartner* stà preschent. Al Radio Rumantsch ha de *Weck* puntuà che *Ladina Heimgartner* haja in grond attest da prestaziun sco schurnalista e sco managera. En la direcziun generala ha ella manà cun success projects fitg complexs ed ha acquistà uschia gronda stima e respect. Ella ha fatg part da la redacziun dad internet en il turmeagl actual da las medias. *Heimgartner* è plinavant bain colliada cun las duas grondas regiuns dals Rumantschs sper l'En (Engiadina) e sper il Rain (Surselva).

Fatg spert carriera

La nova directura da RTR *Ladina Heimgartner* ha cumenzà sia carriera schurnalistica gia durant ses studi a Friburg e quai sco collavuratura libra da las «Freiburger Nachrichten» e da 2001 fin 2006 sco collavuratura dal «Bündner Tagblatt», l'ultim onn sco manadra dal ressort da cultura. 2007 è ella daventada redactura dal Radio Rumantsch e gia suenter in onn manadra dal ressort «Reflexiun». En quella funcziun è ella stada responsabla per las emissiuns emninlas da RTR, tranter auter per «Cuntrasts», «Marella» e «Profil». Ella è era stada participada decisivamain al svilup da l'emisiun d'uffants e giuvenils «Minisguard». Da 2010 fin 2011 è *Heimgartner* stada substituta dal schefredactor RTR.